

BATAKURU NA'BANAANDU YAHUUDIYANKEEBE BEN

*Fii no Iisaa Almasiihu on Burdi Malaa'ikaabe
ben*

¹ Nde wonnoo Alla yewtiriino maamiraabe men ben annabaabe ben laawi buy e nooneeji buy, ² Alla yewtirii en ka nalaadse sakkitore doo Biddo on. O wadi mo ronoowo e kala huunde, awa ko on o tagiri aduna on. ³ Ko on Biddo woni jalbeendi annoora Alla on, ko kanko woni mbaadi Alla ndin tigi. Ko on Biddo woni tambitiido kala huunde rewruude e daaluyee makko dolnudo on. Nde o latinnoo labbingol yimbe ben junubaaji maabbe din, o joodfoyii ka sengo naamo Alla Mawdo on ka kammuuli, ⁴ o woni burdo malaa'ikaabe ben, wano innde nde o roni nden burdiri de maabbe den non.

⁵ Ko fii ko hombo e malaa'ikaabe ben Alla daalani:

«Ko an woni Biddo an on, hande a wonii mo an»,^a

maa o daalani kadi:

«Mi wonanay mo Baaba,

o wonanammi Biddo.»^b

⁶ Bay o addii Afo on ka nder aduna, o daali kadi:

«Yo malaa'ikaabe Alla ben fow sujian mo.»

⁷ Fii malaa'ikaabe ben o daali:

«O waday malaa'ikaabe makko ben hendu e kurkaadfi makko din dendse yiite.»^c

a 1:5 1.5a Zab. 2.7 b 1:5 1.5b 2Sam 7.14 c 1:7 1.7 Zab.
104.4

8 Kono fii Biddo on o daali:
 «Jullere maa laamu nden, yaa an Alla, luttay haa
 poomaa,
 labbooru maa laamu ndun ko labbooru peewal.
9 A yidii peewal ngal, a ajii angal peewal ngal.
 Ko d'un wadi si Alla Joomiraado maa on
 todfor maa nebban weltaare buri wondibbe
 maa ben.» ^d

10 E hoore d'un o daali kadi:
 «Yaa an Joomiraado, ko an wallini ndelo leydi
 ndin ka fudsfoode,
 awa kadi kammuuli din ko juude maa den
 tagiraa.

11 Di lannay, kono an a luttay,
 di fow di nawyiray wa dolokke,
12 jobbiraa di wa waanaare,
 e hoore dun di waylirte wa dolokke.
 Kono an a wa'ay no wa'udaa,
 awa kadi, duubi maa din lannataa.» ^d

13 E ko hombo e malaa'ikaabe ben o daalani:
 «Joodor ka sengo an jaamo,
 haa mi wada aybe maa ben ka ley teppe maa.» ^e

14 Hara bee malaa'ikaabe fow, hinaa be ruuhuji
 kurkotoodi, nulaadi fii gollangol ronoobe kisiyee
 ben?

2

Fii Kisiyee Mawdo on

1 Ko d'un wadi, hid'en haani cataade fota e ko
 nanuden kon, fii wota en selu. **2** Ko fii, si kongudi
 di malaa'ikaabe ben hewtini maamiraabe men
 ben din haqinqinaama, awa kadi kala bonnere

^d **1:9** 1.9 Zab. 45.7-8 ^d **1:12** 1.12 Zab. 102.26-28 ^e **1:13**
 1.13 Zab. 110.1

e noone geddi yobiraama ko handi kon, ³ haray ko honno dadsiroyten si en wedditike e sifa oo kisiyee mawdo? Ko Joomi men on tigi adii fejninde mo, onsay non nanunoobe mo ben haqinqinani en. ⁴ Allaahu on seeditodi e mabbe, o banginiri d'un kuude e maandeeji e noone kaawakeeji moyyi e sendirgol dokke *Ruuuhu Seniido on wano o yidiri non.

Fii Ardotoodo Yimbe ben ka Kisiyee

⁵ Hinaa malaa'ikaabe ben Alla yankinani oo aduna aroyoowo mo wowleten fii mun on.

⁶ Kono goddo no seeditii nokku goo, wi'i:

«Ko honfun woni neddo fii no anditiraa fii makko, yaa an Alla,

e ko woni bii neddanke fii yo a danko mo?

⁷ A wadii mo e ley malaa'ikaabe ben e nder seeda nii,

a taaranii mo *meetelol mangu e teddungal,
a wadii mo e hoore kuude juude maa den,

⁸ a wadii piiji din fow e ley koyde makko.»^f

E nder yankinangol mo piiji din fow, alaa ko Alla acci yo ronku yankinanaade mo, kono haa jooni en yi'aali ka piiji din fow yankinanii mo. ⁹ Kono non e hino ko tawden kon: bawto o wadeede e ley malaa'ikaabe ben fii saalihun nii, kanko Iisaa o wadanaama meetelol mangu e teddungal sabu mayde nde o tampiri nden, fii, tippude e moyyere Alla nden, yo o maayan yimbe ben fow.

¹⁰ E dow ardagol faybe buy ka mangu, tawi no hawrani on Tagudo piiji fow, e mo piiji din fow wonani on, laatinirgol Iisaa timmudo e nder

f 2:8 2.6-8 Zab. 8.5-7

tampereeji, on Sincudo kisiyee mabbe on. ¹¹ Ko fii, ko *labbindo on e *labbindaa be ben fow woni iwdi wootiri. Ko dun wadi kanko Iisaa o hersiraa noddigrol be musibbe, ¹² wano o wi'iri Alla non wonde:

«Mi jantanto musibbe an ben innde maa nden, mi mantoyte ka hakkunde tumbondiral.»g

¹³ O wi'i kadi:

«Mi waday hoolaare an nden e makko.»

Awa kadi:

«E hino lan, min e faybe be Alla okkimmi ben.»h

¹⁴ Awa nde tawnoo faybe ben no mari yiyan e bandu, kanko Iisaa kadi ko wano non o tawdiraa e mabbe, fii, rewrude e mayde makko nden, yo o muncu on joginoodo bawgal mayde nden, dun ko Ibuliisa, ¹⁵ e fii yo o jattin kala wonnoobe e nder maccangaaku e nder ngurndan mun sabu kulol mayde. ¹⁶ Bay, pellet wonaa malaa'ikaabe ben o ari faabagol, kono ko jurriya Ibraahiima on o ari faabagol. ¹⁷ Ko dun wadi si himo haanunoo nandude e musibbe makko ben few, fii no o wonira *yottinoowo mawdo sadaka ka Alla, yurmeteedo, holniido e nder golle Alla den, fii no jamaa on hebira yaafuyee junubaaji. ¹⁸ Bay kanko tigi o tampii fewndo o ndarndaa, himo waawi faabaade wonaabe e ndarndeede ben.

3

Fii no Iisaa Almasiihu on Burdiri Muusaa

¹ Ko dun wadi, yo musibbe an laabube, be mi hawti noddaandu Alla ndun, fenjee mijo

g **2:12** 2.12 Zab. 22.23 h **2:13** 2.13 Isa. 8.17-18

mon ngon e hoore mo Alla todpii neli on, on *Yottinoowo mawdo sadaka ka Alla, on mo qirritiden ka gomfinal men, dun ko Iisaa. ² O wonno sella-findeejo e telen-ma on Todpiido mo, wano Muusaa wonirnoo non e nder suudu Alla ndun fow. ³ E hoore dfun, tawaama ko o Rindando mangu buri ngu Muusaa ngun, ko fii darnudo suudu on no mari teddungal buri suudu ndun tigi. ⁴ Ko fii kala suudu ko goddo darni dun, kono ko kanko Alla darni kala huunde. ⁵ Muusaa kajun wonno kurkaadu sella-findeejo e nder suudu Alla ndun fow, fii seeditagol ko Alla daaloyta kon. ⁶ Kono *Almasiihu on kan ko Biddo sella-findeejo e hoore suudu Alla ndun. Ko enen woni suudu makko ndun, si en catike foto e wakkilaare e hoolaare nde jogiden fii ko tanyinidien kon.

Fii Fowtaare Maranaande Jamaa Alla on nden

⁷ Ko dfun wadi, wano *Ruuhu Seniido on wi'iri non:

«Si on nanii kongol makko ngol hande,

⁸ wota on sattin berde mon den,

wa fewndo maamiraabe mon ben murtannoo mi,

be ndarndii mi ka wulaa,

⁹ ka be liggitunoo mi don, be ndarndii mi,

be yi'uno kuude an den e nder duubi cappande nay.

¹⁰ Ko dfun wadi si mi tikkani ngun jamaanu, mi wi'i:

«Berde mabbe den ko selude saa'i kala,

be andaali laawi an din.»

¹¹ Mi woonduno e nder tikkere an nden wonde:

«Be naatataa ka fowtaare an few!»ⁱ

¹² Awa, reenee, yo musibbe, fii wota hay gooto e mon hebu bernde bonnde e bernde nde gomfinal tabitaa e mun, haa ka yiltodfon e baawo Alla Wuurudo on. ¹³ Kono wakkilindiree hakkunde mon jnande woo, yero no wi'eede hande, fii wota hay gooto e mon sattinir bernde mun daynireede junuubu. ¹⁴ Ko fii en wonii kafidube e Almasiihu on, si tawii en jogitike fota pellital men aranal ngal haa ka sakkitorun, ¹⁵ wano bindi din wi'iri non wonde: «Hande si on nanii hito makko ngon, wota on sattin berde mon den wa fewndo murtaldo ndun.»^j

¹⁶ Ko hombe woni ben murtannoobe Alla, bawto be nanude kongol makko ngol? Hinaa bee be Muusaa ardinoo, yaltini *Misira? ¹⁷ E ko hombe woni ben be Alla tikkannoo e nder dii duubi cappande nay? Hinaa bee wadunoobe junuubu, maayi ka wulaa? ¹⁸ E ko hombe o woondannoo naatataa ka fowtaare makko, si hinaa yeddube ben? ¹⁹ Awa en yi'ii be waawaali naatude ka fowtaare makko, sabu angal gomfinal.

4

¹ Ko dun wadi, yero fodaari fii naatugol ka fowtaare makko no lutti, haray hulen wota goddo e mon aru e tawdeede e ronkoobe naatude ben. ² Ko fii Kibaaru Mooyo on fenjinanaama en, wano beya non, kono kongol ngol be hedii ngol nafaali be huunde, ko fii ko be nanunoo kon, be jabiraano gomfinal. ³ Kono

ⁱ 3:11 3.7-11 Zab. 95.7-11

^j 3:15 3.15 Zab. 95.7-8

enen gomdinbe ben, en naatay e nden fowtaare
nde o innunoo wonde:

«Mi woondii e nder tikkere an nden,
be naatataa ka fowtaare an few!»^k

E hin-le, Alla gayniino golle mun d'en gila ka
fuddoode aduna on. ⁴ Ko fii himo daali nokku
goo ka bindi fii nalaande jeedidabere nden
wonde:

«Ka nalaande jeedidabere Alla fowtino e golleeji
makko din fow.»^m

⁵ Himo daali kadi fahin doo:

«Be naatataa ka fowtaare an few!»ⁿ

⁶ Nde tawnoo no heddanii wobbe goo fii naa-
toygol ton, e hin-le kadi attinoobe hendaade
Kibaaru Mooyo on kajun naataano sabu angal
gomdfinal mabbe ngal, ⁷ e yeeso d'un buy Allaahu
on daaluno kadi iwrude e Daawiida, o toddii
nalaande, o inni nden «hande», wano siforano
non dow doo:

«Hande si on nanii hito makko ngon,
wota on sattin berde mon d'en.»^p

⁸ Si tawiino Yaaswa^q yediino be nden fowtaare,
Alla wowlataano bawto d'un fii nalaande goo.

⁹ Awa jaka no lutti *nalaande fowteteende e mun
fii jamaa Alla on. ¹⁰ Ko fii kala naatudo ka
fowtaare Alla, o fowtoto kadi e golle makko d'en,
wano Alla fowtornoo de mun den non.

¹¹ Awa etoden naatugol ka fowtaare makko
d'on, fii wota hay gooto falju, jokka be doftaaki
ben.

k **4:3** 4.3 Zab. 95.11 m **4:4** 4.4 Fud. 2.2 n **4:5** 4.5 Zab.
95.11 p **4:7** 4.7 Zab. 95.7 q **4:8** 4.8 Ko «Yaaswa» on
wondunoo e Muusaa fewndo o yawata ka fello. Ko Yaaswa on
ardinoo jamaa Isra'iila on, naadi be leydi fodaandi ndin.

¹² Ko fii, daaluyee Alla on ko wuurudo dun-coowo, himo welì buri kaafa ka mbeldfe didi, ko naataydo haa hakkunde ruuhu e wonkii, e hakkunde jokke e mbuso, o jaawa mbeleedfe e mijooji bernde. ¹³ Alaa ko tagaa ko o yi'ataa, fow no wallinaa, wadaa e kene yeeso on mo hunoytoden.

Fii no Iisaa Woniri Yottinoowo Mawdo Sadaka

¹⁴ Bay hidén mari hooreejo mawdo *yottinoobe sadaka ka Alla, tayitudo kammuuli dín, dun ko Iisaa *Bíddo Alla on, catoden e qirritande gomfinal men ngal. ¹⁵ Ko fii en maraa yottinoowo mawdo mo waawataa faamude lo'ere men nden, kono o ndarndoranooma wano men non e di fow, e hoore o wadaali junuubu. ¹⁶ Awa badoren hoolaare ka jullere laamu, ka sulfu on heboytoo ton, fii no hebiren yurmeende e moyyere ko wonana en ballal fewndo haanani en.

5

¹ Awa, kala *yottinoowo mawdo sadaka ka Alla, subaadó e hakkunde yimbe ben, ko joddfiniraa ko fii yimbe ben, fii ko wadsa golleeji Alla dín, fii no be weebitira dokke e sadakaaji fii junuubaaji dín. ² Himo waawi yurmeede be faamaa ben e selube ben, ko fii kanko tigi lo'ereeji no hundi mo. ³ Awa ko sabu nden lo'ere wadi si himo haani ittande hoore makko sadaka, o ittana jamaa on kadi sadakaaji fii junuubaaji maabbe dín. ⁴ Kono hay gooto waawataa hebande hoore mun ngal teddungal wonugol yottinoowo

mawdō sadaka. Ko Alla yedata dūn, wano o toddori *Haaruuna non.

⁵ Ko wano non kadi, hinaa *Almasiihu on tigi yedi hoore mun ngal teddungal wonugol yottinoowo mawdō sadaka ka Alla, kono ko Wi'udo mo on wonde:

«Ko an woni Biddo an on, hande a wonii mo an.»p

⁶ Wano non himo wi'i kadi nokku goo:

«Ko a yottinoowo sadaka ka Alla haa poomaa wano *Maaliki-Siddiiqu non.»q

⁷ E hoore dūn, e nder ngurndan makko dān ka hoore leydi, kanko Iisaa o weebitanno on Gasoowo mo dandude mayde nden gondi e torndeeji e nder ewnagol ko tiidi. Alla jaabinani mo sabu ko o yankinaninoo mo kon. ⁸ Fii kala ko o *Biddo Alla, o andi ko woni doftaare e nder ko o tampi kon fow. ⁹ Bay wonii o wadaama Timmudo, o wonani doftiibe mo ben fow bündu kisiyee poomayankeejo. ¹⁰ Onsay Alla toddii mo yottinoowo mawdō sadaka ka Alla wano Maaliki-Siddiiqu non.

Fii Reenagol e Selugol Gomdinal

¹¹ Hidēn mari piiji buy ko wowlen e fii dūn, hara ko piiji buy mettudi sifaade, ko fii on wonii mettuge faaminde. ¹² E hin-le, e oo saa'i doo hidon haanunoo wonude jannoobe, kono hidon handi kadi e janneede yi'al daaluyeeji Alla din. Fewndo doo ko bira handudon e mun, hinaa jaametee. ¹³ On jokkudo yarugol bira, haray alaa faamu woo e fii daaluyee faaminaydo ngurndan feewudsān dān, ko fii haray haa jooni

ootigi ko boobo. ¹⁴ Mokobaabe ben kajun, ko naametee tedduudo be naamata, ko fii tippude e kuude mabbe den hakkille mabbe den no eltanii sendindirgol ko boni e ko moyyi.

6

¹ Ko d'un wadi, sutanoden jannde yoyunde nden, feyyen jannde baggere fii *Almasiihu on nden, hara en fuddsitaaki jannugol fii tuubugol kuude nawrayde e mayde den, e fii gomdingol Alla, ² e *lootagol maande kisiyee, e *fawugol juude, e immitagol maybe ben, e naawoore poomayankeere nden. ³ Ko d'un wadeten si Allaahu on newnii.

⁴ Fii ndayginananoobe, mettii dokkal kam-muyankewal ngal, tawdaa e hendiibe *Ruuhu Seniido on, ⁵ mettii moyyuki daaluyee Alla on wondude e doole aduna aroyoowo on ben kan, ⁶ si be aru e selude gomfinal ngal, be waawetaake yilteede ka tuubuubuyee han kadi, ko fii haray kambe tigi be fempitike *Bidsfo Alla on, e hoore d'un be aybinii mo e kene. ⁷ Nde leydi yari ndiyan saayoojan soono woo, ndi fudini pudi wondusi e nafa fii mo ndi remanaa on, haray hindi wondi e barki Alla. ⁸ Kono si tawii ko bulle e kebbe ndi funnata, haray hinaa ndi huunde, ko ndi badondirndi e kuddi, sakkitora sunneede.

⁹ Hay si men yewtirii nii, yo yiibbe amen, haray meden hoolii hidon e laawol moyyol e telen-ma kisiyee on. ¹⁰ Ko fii Alla hinaa mo feewaa, sakko o yejjita kuude mon den, e giggol ngol holludon fii innde makko nden, e golle de wadudon den e de wadanton den kadi yimbe

Alla ben. ¹¹ Kono meden faalaa yo mo kala e mon hollir nii wakkilaare wootere nden e telenma pellital timmungal fii ko tanyiniden kon haa ka sakkitorun. ¹² Ko d'un wadi, wota on wonu aamube, kono nembee ben hebirnoobe ndondi fodaandi ndin gomdinal e munal.

Fii Fodaari Alla ndi Firtotaako ndin

¹³ Ko d'un wadi, nde Alla wadannoo Ibraahiima fodaari ndin, o tawno o waawataa woondirde ko buri mo kanko Alla mawnude, o woondiri hoore makko kanko tigi, ¹⁴ o wi'i:

«Pellet, mi waday barki e maa fota,
mi yajnjay jurriya maa on yajnjudee.»^r

¹⁵ Ko e nder d'un, bay wonii Ibraahiima habbike e nder munnaare, o hebi non ko o fodanoo kon.

¹⁶ E hin-le, yimbe ben no woondira ko buri be mawnude, nden woondoore wonana be seedee fii rawnoode kala yeddondiral. ¹⁷ Ko wano non, hakkee ko Alla faalanoo hollude ronoobe fodaari makko ndin ben noone no anniye makko on firtortaa, o wadirno d'un woondoore ¹⁸ fii, sabu dee kuude didi de waylotaako, de tawata gasataa ka Alla fena, no enen fattiibe ben hebiren wakkilaare tiifunde fii tamagol e tama'u mo Alla weebitani en on. ¹⁹ On tama'u no wa'ani en wa saanirgal tiifungal holnii fii ngurndan men dan, rewoowo ka *wirngallo fii naatugol ka nder *nokkuure hormorde mawnde nden, ²⁰ d'un ko ka Almasiihu on naati d'on fii men wa fertaniido en laawol, o woni *yottinoowo mawdo sadaka ka Alla haa poomaa, wano *Maaliki-Siddiiqu non.

7

*Fii no Maaliki-Siddiiqu Woniri Yottinoowo
Sadaka*

¹ Ko *Maaliki-Siddiiqu on wonnoo lando Salaam, e *yottinoowo sadaka ka Alla Jom Bural on. O yahi, o fottoyi e Ibraahiima fewndo ko on iwtata fooloygol lambe ben, kanko Maaliki-Siddiiqu o du'anii mo. ² Ibraahiima jonni mo sappabun e di fow. Ko adii kon taho, innde Maaliki-Siddiiqu nden no firi «lando peewal». E hoore d'un kadi ko o lando Salaam, e maanaa lando buttu. ³ Kono o alaa neene, o alaa baaba, o alaa iwdi, o alaa fudsdoode, o alaa kattudi ngurndan. O wa'i wa *Biddo Alla, o woni yottinoowo sadaka ka Alla haa poomaa.

⁴ Ndaaree ko haa honto o mawni, on mo Ibraahiima mawdo on tigi jonni sappabun mun e nder ko o heboyi kon! ⁵ Sariya on toofsi e bibbe *Lewi ben wonugol yottinoobe sadaka ka Alla e yantoobe sappabun e hoore ko jamaa *Isra'iila on hebi kon fow, d'un ko e ben bengootoobe maabbé, fii kala ben ko be jurriya Ibraahiima. ⁶ Kono Maaliki-Siddiiqu, mo tawdaaka e jurriya Lewi on, o hendike sappabun Ibraahiima on, e hoore d'un, o du'anii on hendiido fodaariiji din. ⁷ E hin-le yeddotaako ko mawdo on du'antoo tosooko on. ⁸ E hin-le, e telen-ma yottinoobe sadaka ben ka bolondaa Lewi, ko maayaybe woni hendaade sappabun dun, kono e telen-ma Maaliki-Siddiiqu kan, ko wuurudo woni ko hendii, wano seeditoraa non. ⁹ Ka rabbindinnde, Lewi, oo wondo hendaade sappabun dun, o yobiino ko makko kon rewruude

e Ibraahiima. ¹⁰ Ko fii hari himo ka keeci ben makko wa fewndo ko Maaliki-Siddiiqu yahi fottugol e Ibraahiima.

Fii no Almasiihu on Woniri wa Maaliki-Siddiiqu

¹¹ Ko rewrude e yottinoobe sadaka ka gorol Lewi ben jamaa Isra'iila on hendornoo Sariya on. E hin-le, si tawno golle ben yottinoobe sadaka ko timmuuode, harayno ko fii hondun haanannoo wadfugol yottinoowo goo wano Maaliki-Siddiiqu non, hara hinaa wano *Haaruuna non? ¹² Ko fii si aada wonugol yottinoobe sadaka ben waylike, haray no haani kadi ka Sariya on waylee. ¹³ Ko fii on mo dii piiji wowli fii mun on, ko jeyaado e bolondaa goo mo hay gooto todshaaka e mun fii golle *layyorde nden. ¹⁴ E hoore dfun, wano andirden non tigi, Joomi men on ko feepudo e bolondaa *Yahuuda on. E telen-ma wonugol yottinoobe sadaka, Muusaa wowlaali few fii on bolondaa.

¹⁵ Dundoo kadi no buri banginde si yottinoowo sadaka goo feepirii wa Maaliki-Siddiiqu, ¹⁶ wontudo yottinoowo sadaka, hara hinaa tippuude e Sariya yubbondirdo e gorol lannoowol, kono ko tippude e doole ngurndan dan lannataa dan. ¹⁷ Bay no seeditaa wonde:

«Ko a yottinoowo sadaka ka Alla haa poomaa, wano Maaliki-Siddiiqu non.»^s

¹⁸ Awa, ko yamiraan baawo doo kon ittaama, sabu lo'ere mun nden e mehidfugol mun ngol, ¹⁹ ko fii Sariya on waawaali timminde huunde. Kono en

addanaama tama'u burdo moyyude mo badoren Alla.

²⁰ Dun non wadaaka e baawo woondoore. Beya non kajun wontii yottinoobe sadaka ka Alla e baawo woondoore, ²¹ kono kanko Iisaa o wontirno d'un woondoore, bay Alla daalanno mo d'fundoo:

«Mi woondii, mi firtataa,
ko a yottinoowo sadaka ka Alla haa poomaa.»^t

²² Ko d'un wadi si Iisaa wonii holnuudo *ahadi burndi hittude ndin. ²³ E hoore d'un, hari ben yottinoobe sadaka no woodunoo buy, ko fii hari mayde nden no hadi be duumagol e golle mabbe den. ²⁴ Kono Iisaa kajun, bay tawii himo wuuri haa poomaa, golle makko yottingol sadaka d'en lannataa. ²⁵ Ko d'un wadi kadi, himo waawi dandude few ben wonbe badorde Alla sabu makko kanko Iisaa, bay himo wuuri haa poomaa fii fattanagol be.

²⁶ Ko wano on yottinoowo mawdo sadaka tigi haanannoo en, hara ko *seniifo, mo bonnaali, mo aldaa e junuubu, seedudo e junuubanke'en, e burdo kammuuli d'in banteede, ²⁷ mo hatonjinaa e ittugol sadakaaji wano yottinoobe mawbe ben ittirta pande woo sadakaaji fii junuubaaji mabbe din, kambe tigi taho, e di jamaa on din kadi. Iisaa wadii d'un nde wootere ko yoni fii saa'iji din fow, e nder ko o itti hoore makko sadaka kon. ²⁸ Sariya on kajun, be toddotoo ben fii wonugol yottinoobe sadaka mawbe ko yimbe lo'ube, kono daalol woondoore nden bawto Sariya on tod'dike Bid'fo on, on wondo Timminaado haa poomaa.

^t **7:21** 7.21 Zab. 110.4

8

*Fii Ahadi Heyri ndin e Nokkuure Hormorde
Mawnde nden*

¹ Awa e hino nafa többere nde wonden yewtude fii mun nden: hidēn mari wano oo *yottinoowo mawdō sadaka ka Alla, joodiido ka sengo jaamo jullere laamu Alla Mawdō on ka kammuuli. ² Ko o golloowo ka nder nokkuure hormorde, dūn ko ka *rewirdu goongaaru, hara hinaa ndu yimbe ben darni, kono ko Joomiraado on.

³ Kala yottinoowo mawdō ko todforaa ko fii weebitangol Alla dokke e sadakaaji, bee yottinoowo men mawdō on kadi heba godsfun ko o weebita. ⁴ Si tawno himo ka hoore leydi, o wonataano yottinoowo sadaka, bay no woodi weebitoobe dokke, hara ko no yaadiri e Sariya on. ⁵ Ben no wadude dewal ngal tawata ko mbaadi e dōwdi goongaaji kammuyankeejī din, wano Muusaa banginiranaa non fewndo ko o darnata rewirdu ndun, Alla daalani mo: «Ndaaru, a wadiray fow noone no holliradaa non ka hoore fello.»^u ⁶ Kono jooni, *Almasiihu on hebii golle burde mawnude de beya dēn, no o woniri non holnudo *ahadi burndi moyyude ndin, sincaandi e fodaariiji burdi keldude din.

⁷ Si tawno ahadi araniri ndin wonno ndi felnaaki, hewtataano ka wonndi dabbēe. ⁸ E hinle ko e hoore feloore Alla daalani jamaa mun on:

«Kanko Joomiraado on o daali:
<Nalaande no aroya nde mi yettodoyta
e yimbe *Isra'iila ben

e yimbe *Yahuuda ben ahadi heyri.

⁹ Ndin ahadi wa'oytaa wa
 ndi mi ahodunoo e baabiraabe mabbe ben ndin,
 wa fewndo mi tambitornoor be juufde an d'en
 fii yaltingol be Misira,
 ko fii be hunnaali ahadi an ndin.»
 «Joomiraado on daali:
 «Min kadi jooni mi huccii be.
¹⁰ E hino non ahadi
 ndi mi ahodoyta e yimbe Isra'iila ben
 bawto dee nalaade doo.»
 «Joomiraado on daali:
 «Mi wadoyay sariyaaji an din ka miijo mabbe,
 mi winda ci ka berfde mabbe,
 min mi wona Alla mabbe,
 kambe kadi be wona jamaa an.
¹¹ Hara be hatonjinaa e jannindirgol
 maa fillitanagol wondisdo mun maa musidso
 mun,
 wi'a: Bee andaa Joomiraado on!
 Ko fii fow andoyay lan,
 gila e burdo fandude on
 haa e burdo mawnude on.
¹² Ko fii mi yaafoyto ellaaji mabbe din,
 mi hakkilanoytaa e junuubaaji mabbe din.»^w
¹³ Ka o inni ndin ahadi heyri don, ko don o wattii
 araniri ndin hinndi. E hin-le hinndi ndin nawyii,
 no e moggo mulugol.

9

*Fii Dewal Adunayankewal ngal e
 Kammuyankewal ngal*

¹ Ahadi* araniri ndin kadi no marnoo aadaaji mun yaadudi e dewal, wondude e nokkuure mun hormorde ka aduna doo. ² E hoore dun, *rewirdu wafanooma. Nokkuure aranere nden e ndun rewirdu no wi'etenoo hormorde, ka joddfinirde pitilli nden wonnoo don, e taabal ngal e bireedijje weebitanaade Joomiraado on den. ³ E hoore dun, baawo *wirngallo dimmo ngon, tawi no d^on nokkuure wi'etenoonde *hormorde mawnde nden. ⁴ Tawi hinde wondunoo e sunnirde urngallooji tafiraande kanjje, e *kankiranwal seeditoore hoobiraangal kanjje haa hunditi. Tawi no e nder maggal loonde kanjje wadfornde <*manna>, wondude e tuggordu *Haaruuna ndun, ndu tawata hari finii, e alluuje maande ahadi d^on. ⁵ Tawi no ka hoore kankiranwal nandollaaji *serubiina Mangural ngal, omborde maggal on, dun ko ka junuubaaji din yaafetee don, no duwiraay gabitanji majji din. Kono hinaa fewndo doo haanuden wowlugol fensita fii kun kala e koy piihoy.

⁶ Nde tawnoo d^on fow ko non joddfiniranoo, *yottinoobe sadaka ka Alla ben naatayno soono woo ka nokkuure aranere e nder rewirdu ndun, fii wadugol golle diina mabbe kan. ⁷ Kono ka *nokkuure hormorde mawnde, ko yottinoowo mawd^o on tun naataynoo ton nde wootere e nder hitaande nden, e hoore addorgol yiyan ko sakkoo fii hoore mun e fii ellaaji dⁱf jamaa on wadiri angal andude. ⁸ Ruuhu* Seniido on no holliri en telen doo wonde d^atal nokkuure hormorde mawnde nden udditaaki, fannamaa

rewirdu aranuru ndun no lutti. ⁹ Hidēn mari doo misal fejnningal goongaaji fewndiidi hande dīn. Dun fow no bangini wonde dokke e sadakaaji, ko weebitirantenoo nii Alla, waawataa labbinde bernde on rewiroowo non. ¹⁰ Ko dūndoo woni yamirooje neddanke tun yubbondirde e naameteeji e njaramji e noone salligiji, yamiraadē haa jande Alla heydfintini piiji dīn fow.

¹¹ Kono *Almasiihu on ardii wa yottinoowo mawdō sadaka fii moyyereeji fewndiidi dīn. O tayiti rewirdu burndu mawnude ndun e burndu timmude ndun, ndu tawata hinaa darniraandu juude yimbe, e maanaa ndun hinaa ndu oo aduna. ¹² O naatii ka nokkuure hormorde mawnde nde wootere ko yoni haa poomaa, rewrude e yiyan makko dān tigi, hara hinaa rewrude e yiyan ciikuliji e nalbi. Ko nii o yedfiri en cottudi poomayankeeri. ¹³ Si tawii yiyan ciikuliji e ga'i na'i e ndoondi wiige, ko wiccitee junjee e hoore yimbe be laabaa, no labbina be ka bandu, ¹⁴ kono Almasiihu on kajun ko hoore mun tigi ittani Alla sadaka e baawo ella, e hoore ardoreede Ruuhu Poomayankeejo on, ko haa honto non yiyan makko dān labbinta berde men, itta en e kuude nawrayde en e mayde, fii no rewiren Alla Wuurudo on!

¹⁵ Ko dūn wadi si ko kanko woni holnuudo ahadi heyri ndin, fii yo noddaabe ben hendo ndondi poomayankeeri ndi Alla fodi be ndin. Ko fii mayde makko nden wonii sadaka fii sottugol be e dīn bonnereeji wadaadi ka fewndo ahadi hinndi. ¹⁶ Ko fii, ka wasiyannde nden woni don, haray no haani ka mayde wasiyido on

andee. ¹⁷ Wasiyannde nden non laatike woo bawto mayde nden, ko fii nde alaa nafa fewndo wasiyido on wuuri. ¹⁸ Ko dun wadi, ahadi araniri ndin tigi, ndi udditaaka e baawo hibbugol yiyan. ¹⁹ Bay Muusaa gaynii weebitande jamaa on fow kala yamiroore, wano cse woniri non ka Sariya, o yetti yiyan ga'i na'i e ciikuliji e ndiyan e gaara bode, o wicciri deftere nden e jamaa on baapal no wi'ee *hisoopu, ²⁰ e hoore himo wi'a: «Dundoo ko yiyan ahadi ndi Alla yamiri fii mon ndin nii.»^y ²¹ Ko wano non kadi, o wicciri rewirdu ndun e aalaaji gollirteedi fii diina din yiyan. ²² E telen-ma Sariya on, fayda fow ko yiyan labbiniraa, ko fii yaafuyee alaa e baawo hibbugol yiyan.

²³ Din aalaaji lontiidi goongaaji kammuyankeeki, no haanunoo labbinireede oo noone dfoo, kono no haaniri non ka haqiqaaaji kammuyankeeki din labbiniree sadakaaji burdi moyyude. ²⁴ Ko fii Almasiihu on naataali e nder nokkuure hormorde wadiraande juude nedfanke, nembinaande goongaare nden, kono ko ka kammu tigi fii no o weebitorana en jooni yeeso Alla. ²⁵ O naatiraali fii ittugol hoore makko sadaka soono woo, wano yottinoobe mawbe ben naatirta hitaande woo ka nokkuure hormorde mawnde wondude e yiyan dan tawata wonaa yiyan makko. ²⁶ Ko fii, si hinaano cfun, Almasiihu on tampayno soono woo gila ka fuddoode aduna on. Kono jooni, ka lannoode jamaanuuji, o feepii nde wootere ko yoni fii saa'iji din fow fii bonnitugol junuubaaji e nder

ko o itti hoore makko sadaka kon. ²⁷ Nde tawnoo no maranaa yimbe ben maayugol nde wootere pet, bawto dun naawoore nden wada, ²⁸ ko wano non Almasiihu on ittiri hoore mun sadaka nde wootere pet fii ronditagol junuubaaji yimbe duudube. Awa, o artoyay kadi, hara hinaa fi ronditagol junuubaaji, kono ko fii dandugol ben habbornoobe mo kisiyee.

10

Fii Sadaka mo Almasiihu on Itti on

¹ E hoore d'fun, wonaa Sariya on tigi woni haqi-iqaaji aroyaynoodi din, kono ko mbaadi mun tun. O waawataa few laatinde ben badoraybe non Alla timmube, rewrude e on sadaka gooto jokkondirso hitaande woo hitaande. ² Si o waawayno, harayno neefii ko ben wadaynoobe din sadakaaji acci, harayno be labbinaama nde wootere ko yoni haa poomaa, harayno kadi bernde mabbe felataa be e telen-ma junuubu woo. ³ Kono, din sadakaaji andintinay en hitaande kala fii junuubaaji din. ⁴ Ko fii waawataa ka yiyan ga'i na'i e ciikuliji monta junuubaaji.

⁵ Ko dun wadi, e nder naatugol e nder aduna on, *Almasiihu on no wi'i:

«Wonaa sadakaaji maa dokke faaladaa,
kono a wadanii lan bandu.

⁶ A weltoraali sadaka sunneteedo,
maa ko sakkaa fii junuubu.

⁷ Awa mi wi'i: «E hino lan, mi arii
fii wadugol faale maa on, yaa an Alla,

wano fii an windori non e nder ndee deftere taggiinde.»^z

⁸ Himo wi'i taho: «A yidaali e a weltoraali sadakaaji e dokke e sadakaaji sunneteedi e sadakaaji fii junuubaaji, wadiranoodi no yaadiri e Sariya on.»

⁹ E hoore d'un o wi'i kadi: «E hino lan, mi arii fii wadugol faale maa on.» O ittii aranun d'un fii sincugol dimmun d'un. ¹⁰ Awa, ko sabu faale Alla on *labbinaden fii wonugol yimbe makko, rewrude e oo sadaka mo Iisaa Almasiihu on ittiri bandu mun ndun tigi nde wootere ko yoni haa poomaa.

¹¹ Kala *yottinoowo sadaka ka Alla no ka gollata d'on jande woo fii wadugol golle mun diina c'en, e ittugol sadakaaji gooti jande woo, di tawata waawataa ittude junuubaaji few.

¹² Almasiihu on non kapun, o wadii sadaka gooto bajjo fii junuubaaji din, yonudo haa poomaa, awa kadi himo joofii ka sengo jaamo Alla,

¹³ himo sabbii d'on haa Alla wada aybe makko ben ka ley koyde makko. ¹⁴ Ko dokkal bajjal o timminiri haa poomaa wonaabe *labbineede fii wonugol yimbe Alla ben. ¹⁵ Ko d'un *Ruuhu Seniido on seeditanii en kadi. Ko fii himo wi'i taho:

¹⁶ «Joomiraado on daali:
 «E hino *ahadi ndi mi yettodoya e maabbe ndin:
 Bawto dee nalaadee doo,
 mi wadoyay sariyaaji an din ka berde maabbe,
 mi windoya di ka hakkille maabbe.» »

¹⁷ O beyditi e d'un:

^z **10:7** 10.7 Zab. 40.7-9

«Mi anditoytaa hande kadi fii junuubaaji maßbe
din
e angal peewal maßbe ngal.»^a

¹⁸ Ko fii ka junuubaaji din yaafaa d'on, haray alaa ko sakkee fii junuubu.

Fii Gomdfinal Yimbe ben

¹⁹ Ko dun wadi, yo musibbe an, bay hid'en mari hoolaare fii naatugol ka *nokkuure hormorde mawnde sabu oo sadaka yiyan lissaa ²⁰ dan o udditirani en laawol kesol wurgol, rewrungol ka *wirngallo, ngon-le ko bandu makko ndun, ²¹ e bay kadi hid'en mari yottinoowo mawdo wondo ka suudu Alla, ²² badoren Alla bernde nundfunde e gomdfinal heewungal pellital, e bernde labbinaande kala mijooji bondi, e bandu lootiraandu ndiyan laabudfan. ²³ Wonen catiibe tabiti e tama'u mo qirritid'en on, ko fii Wadando en din fodaariiji on ko Sella findeejjo. ²⁴ Mijondiranen ko honno waaweten wakkilindirde ka giggol e ka kuude moyye. ²⁵ Wota en tert'o mottondiral men ngal, wano wobbe woowiri non. Kono wakkilindiren fodde hid'en yi'ude palaande nden no badaade.

²⁶ Ko fii si en duumike wadugol junuubu e nder tewaare bawto en hendaade gandal goonga on, haray sadaka alaa hande kadi fii junuubaaji, ²⁷ kono ko habbannde jaawoore hulbiniinde e nguleendi yiite hebulinge sunnugol murtube ben. ²⁸ Si godso bonniino Sariya Muusaa on, o wareteno, o yaafetaake, e hoore seeditoore cido maa tato. ²⁹ E mijjo mon onon, si godso hayfinii

^a **10:17** 10.17 Yer. 31.33-34

*Biddo Alla on, si o jogitorii yiyan ahadi dan wa dan aldaa e fiira, dan dan o *labbiniraa, e si o hoynii Ruuhu Allaahu on, on Jom Sulfu, e hara on mijaaki himo handi e lette burde muusude kadi? ³⁰ Ko fii hidan andi on Wi'udo: «Ko min yottagol woodani, ko min yoboya», e hoore dun: «Joomiraado on naaway jamaa mun on.»^b ³¹ No hulbinii yanugol e juude Alla Wuurudo on!

³² Anditee liddu dun ka saa'iiji arani, bawto Alla ndayginande on, on ηapnino satteende tiifunde e nder tippiro muusungo. ³³ Ko fii e saa'i goo on hoynano, cukkadon e kene, e saa'i goo jonnindirdon juude e ben wadiranoobe wano non. ³⁴ E hoore dun, yurmadon sokaabe ben, jabudon kadi e nder weltaare yo on jatte keyeeji mon din, sabu andugol mon hidon mari keyee burdo moyyude, luttoo wo. ³⁵ Awa wota on accitu hoolaare mon addaynde mbarjaari mawndi nden. ³⁶ Ko fii hidon haani ηajnaade, fii, nde timminoydon faale Alla on, yo on hendoyo ko o fodi on kon.

³⁷ Ko fii e nder saa'ihun nii:
«Haanudo arude on aray, neebataa.

³⁸ Feewudo an on non wuuiray gomdinial.
Kono si o yiltitike,
wonkii an kin weltanoytaako mo.»^c

³⁹ Enen-le hinaa en yiltoroobe baawo fii hayrugol, kono ko en gomdinbe fii dandegol.

11

Fii Seeditorbe Gomdinial ka Ahadi Hinndi

b 10:30 10.30 Yaj. 32.35-36 c 10:38 10.38 Hab. 2.3-4

¹ E hin-le, gomdfinal ngal ko pellital fii piiji di tanyiniden, e hoolaare fii piiji di en yi'aali taho. ² Alla kulji mawbe baawo doo ben sabu gomdfinal maabbe ngal.

³ Ko gomdfinal ngal wondsen andirde aduna on ko daaluyee Alla on tagiraa. Ko d'sun wadi ko yi'eten kon iwraa e ko yi'otoo.

⁴ Ko gomdfinal ngal Haabiila yediri Alla sadaka burdo moyyude mo Qaayiina on. O kuljiraa feewudo sabu ngal gomdfinal. Alla tigi kulji o'en dokke makko. Fii kala kanko Haabiila o maayii, kono ngal gomdfinal no banginde fii makko.

⁵ Ko gomdfinal ngal kadi Hanuuka yentiniraa fii wota o andu mayde nden. En yi'ataa mo hande kadi sabu Allaahu on yentinno mo. Ko fii, ado o yentineede, hari o hebiino kuluujaa wonde himo weltini Alla. ⁶ Awa, e baawo gomdfinal, gasataa ka ontigi weltina Alla, ko fii on badotoodo mo no haani gomdfinde wonde kanko Alla himo woodaa, gomdfina kadi ko kanko woni yoboowo dabboobe mo ben.

⁷ Ko gomdfinal ngal fahin Nuuhu moyyinirnoo laana fii dandugol beynguure mun nden. Ko nii o teddiniri ko Alla *hiitaninoo mo fii ko aroyta yi'aaka taho kon. Bay o warrii non kanko Nuuhu, tawi o hollii wonde yimbe aduna on ko felniibe. Alla jogori Nuuhu feewudo sabu gomdfinal makko ngal.

⁸ Ko gomdfinal ngal kadi Ibraahiima doftori noddaandu ndu Alla noddi mo ndun fii yahugol e leydi ndi o ronoyta ndin. O yahi e hoore o andaa ka o woni yahude. ⁹ Ko gomdfinal o hodiri e ndin leydi fodaandi wa leydi jananiri, o hodii

e nder cuudi bagi. Issaaqa* e Yaaquuba kadi hodiri non, be ronidi e makko fodaari wootiri ndin. ¹⁰ Ko fii hari, kanko Ibraahiima himo habpii hodo ngo tawata didol cuudi mun no tiidi, ngo tawata ko Alla ebbi, darni. ¹¹ Ko sabu gomdinal ngal kadi, fii kala Saarata kapun ko mo jiidotaako, o hebiri feere jurriyagol e nder nayeewu makko, bay himo hoolii wonde Alla ko hunnoowo ko o fodi kon. ¹² Ko d'un wadi si neddo gooto, mo tawata mayde mun nden hebiino d'un, hebi jurriya burdo koode d'en ka kammu duufude e njaareendi ndin ka sera baharu, ko tawata en waawataa limude.

¹³ Ko e nder gomdinal ngal be fow be maayi e baawo hendagol piiji fodaadi din, kono be haynino di ka woddi, be weltori, e nder qirritagol ko be tunjarankeebe e jananbe ka leydi. ¹⁴ Yewtiraybe nii ben hollii no laabiri wonde hibe dabbande hoore mabbe leydi heyri. ¹⁵ Si tawno non be wuldsano ka be iwi ton, be hebayno feere no be yiltora. ¹⁶ Kono ka haqqiqa hibe himmannoo nokkuure burnde moyyude, d'un ko ka kammu. Ko d'un wadi Alla hersiraa noddeede Alla mabbe, ko fii o moyyinanii be hodo.

¹⁷ Ko gomdinal ngal kadi Ibraahiima weebitiri Issaaqa fii layyagol fewndo ko Allaahu on ndarndii mo. Hari himo e fii sakkagol Issaaqa, bidso makko bajjo on, kanko hendifoodo fodaariiji din, ¹⁸ d'un ko on mo Allaahu on daalannoo wonde: «Ko e Issaaqa jurriya maa on nodditirtee.» ¹⁹ Himo joginoo wonde Alla ko Waawudo hay immintingol maydo e hakkunde maybe ben, ko d'un wadi si o hettitiri bidso

makko on wa immitiido e mayde.

²⁰ Ko gomdinal ngal kadi Issaaqa du'orani Yaaquuba e *Iisu fii ko aroyta kon.

²¹ Ko gomdinal ngal fahin, fewndo Yaaquuba maayata, o du'orani mo kala e bibbe Yuusufu ben, o uggini e hoore tuggordu makko ndun, o sujjani Alla.

²² Ko gomdinal ngal fahin, bay badike ka Yuusufu maaya, o maandiniri fii eggudu *Banii-Isra'iila'en ndun *Misira, o wadī kadi yamirooje fii yi'e makko den.

²³ Ko gomdinal ngal kadi, bay Muusaa jibinaama, mawbe makko ben suudiri mo lebbi tati, bay be tawii boobo on no labaa fota, awa kadi be hulaano yamiroore lando on.

²⁴ Ko gomdinal ngal kadi, bay Muusaa mawnii, o salori wi'eede ko o gedfal jiwo Fir'awna on. ²⁵ O tawi ko tampindineede e jamaa Alla on burani mo, edii weltorgol junuubu e nder saa'ihun.

²⁶ Tawi himo mijji wonde ko aybinireede wa *Almasiihu on buri jogaade ngalu tiifungu edii ngu Misira ngun, ko fii himo ndaaraynoo ka muutii telen ka njoddi. ²⁷ Ko gomdinal ngal o yaltiri Misira e baawo denyagol tikkere lando on, bay himo catornoo wa sutiido on mo yi'otaako.

²⁸ Ko gomdinal ngal kadi o wadiri *Juldeere Yawtaneede nden, e wujugol yiiyan fii wota mulooowo dikkuruube on meemu ko dikkoranaa Isra'iilayankeebe ben kon.

²⁹ Ko gomdinal ngal fahin be tayitiri *Bahraru Bodeejo on wa leydi yorndi, kono nde Misirayankoobe ben ebbunoo wadifrgol non, be yoolino.

³⁰ Ko gomfinal ngal kadi tata on Yeerikoo yaniri, bay be gaynii taaraade mo e nder balde jeedidi. ³¹ Ko gomfinal ngal kadi wadi si *Raabi, oo debbo cagaajo, maydaano e heeferbe ben, sabu ko o wernirnoo tefooobe ñen kon buttu.

³² Ko hondun mi wi'ata kadi? Saa'i on yonantaa lan si tawii mi wowlay mi fensita fii oo wi'eteedo *Gadawna e *Baaraka e Samsuuna e Yiftaaha e Daawuuda e Samu'iila e annabaabe ñen. ³³ Ko gomfinal ngal be fooliri laamateeriji, be tabintini peewal, be hebi fodaariiji, be ombi sekko ngayuuje. ³⁴ Be dannini giiteeli bonnooji, be dadi mbelndi kaafa, be heewi doole fii kala hibe lo'unoo, be hollitii ka nder hareeji, be radii koneeli jananbe ñen. ³⁵ Rewbe yi'i maybe mun no immitoo. Wobbe goo kadi lettaa, be salii sotteeede fii no be hebira ummutal burngal moyyude. ³⁶ Wobbe ñen hebi aybineede e focceede, e hoore jolkeede sokee. ³⁷ Wobbe ñen wariraa kaaye, wobbe ñen tampinaa tayaa didi, maa wariraa kaafa. Wobbe nawri ngurndan mun dan yaarugol hen fow, hara no bornii guri baali maa be'i, billorbe di fow, cukkee tampinee. ³⁸ Hari aduna on handaa e ñen, be tawata wonundeeji mun ko ka wulaaji e ka pelle e ka pammeeje e ka gayde.

³⁹ Ben kuljiranoobe sabu gomfinal mun ngal fow non, hendaaki ko be fodanoo kon. ⁴⁰ Ko fii Alla no ebbani en godsun ko buri moyyude, fii wota be laato timmube e baawo men.

12

Fii no Alla Wurtirta en wa Bibbe mun

¹ Bay wano ngal dental mawngal seedeebe no hundi en, bugitoden kala dongal e junuubu ko falli en no weebiri, dogiren wakkilaare dogudu ndu ebbanaden ndun. ² Punnoden Iisaa, on wondo dayyere gomdfinal ngal, on timminoowo ngal. Bay himo sutinoo weltaare maraniinde mo nden, o jabuno *leggal altindiraangal ngal, o yawitii hersa, o joodii ka sengo naamo jullere laamu Alla. ³ Mijjitee fii on ኃናንጻዴስት ndee liddannde nde junuubanke'en liddii mo, fii wota ronkere hebu on haa berde mon maaya.

⁴ E hin-le e nder gertagol mon junuubu ngol, on dartaaki haa yiyan mon dan hibbi. ⁵ Awa kadi on yejjitii kongol ngol Allaahu on wakkiliri on ngol wa bibbe makko:

«Bidso an, wota a jogitor wurtannde Joomiraado on no hayfiri,
awa kadi wota bernde maa maayu nde o wurtumaa.

⁶ Ko fii ko mo Joomiraado on yidi, o wurtata,
o yaggina kala mo o jabi yo wonu bidso makko.»^d

⁷ Wakkilee tampereeji mon din, ko din woni on wurtude. Ko wa bibbe Alla woni on jogitorde.

Ko hombo woni bidso mo ben mun wurtataa?
⁸ Kono si on woorike wurtannde nde fow hebata nden, haray ko on fattuube, hinaa on bibbe.

⁹ Bay en hebii baabaabe ka aduna doo wurtaynoobe en, be teddinnoden, ko haa honto non haanuden yankinanaade Ben ruuhuji men din fii no wuuriyen! ¹⁰ Ko fii baabiraabe men ben no wurtaynoo en e nder saa'ihun nii, bay be tawno

ko ko moyyi, kono Alla ko woni en wurtirde ko fii nafa men on tigi, fii no tawreden e laabal makko ngal. ¹¹ No fellitaa fewndo wurteede nandaa e huunde weltinnde, kono ko satteende. Kono bawto d'un, battane ngurndan feewufan wondan e nder buttu no maranii ben wurtaabe.

¹² Ko d'un wadi si mi wi'ay on, bantee juude mon lo'ud'e den, sattinon koppi mon lo'udi din, ¹³ yo koyde mon den jokku laawi feewudi din, fii wota layooje den worgito, kono de sella.

Fii no Hittiniren e Noddaandu Heyru ndun

¹⁴ Etee no wondiron e fow e nder buttu, wuuron e nder laabal, ko fii baawo maggal hay gooto yi'ataa Joomiraado on. ¹⁵ Reenee fii wota hay gooto nakkire moyyere Alla nden, wota dadol haadfungol woo kadi funtu, wona sabu jiiboldu haa raaba buy e mon. ¹⁶ Reenee fii wota hay gooto e mon jeenu, maa wona keefeero wa *Isu, on yeeyitunoodo afoyaagal mun ngal fii nafakka gooto. ¹⁷ Hidon andi, bawto d'un, wa fewndo ko o faalaa hebude du'aa ben makko on, o bugitano, ko fii o hebaano feere waylugol mijjo ben makko ngon, fii kala hari himo dabbirde dun gondi.

¹⁸ Ko fii onon, on badaaki fello ngo waaweten meemude, e yiite hubbunge e dowdi duule e nibe e nduluuru, ¹⁹ maa hito *liital, maa hawa ka *Isra'iilayankeeben nanunoo kan haa be wi'i wota be beyditane hay kongol, ²⁰ ko fii be tow-nataano sifa ndee yamiroore tiifunde doo: «Hay si mummunte meemiino ngon fello, warirteno

kaaye.»^d ²¹ Hakkee ko d'un hulbininoo, Muusaa wi'i: «Mi diwnii hakkee ko mi huli!»^e

²² Kono onon, on badike Fello *Siyuuna ngon e saare Alla Wuurudo on, d'un ko *Yerusalaam kammuyankeeojo on, e guluuje malaa'ika mottondiri e nder weltaare. ²³ On badike dental dikkuruube Alla ben, ben be tawata no windii ka kammuuli. On badike Alla, on Naawoowo yimbe ben fow, e ruuhuji feewube timminaabe ben. ²⁴ On badike Iisaa, on holnudo *ahadi heyri ndin, e yiyan makko hibbaadan, dan seeditoore mun buri moyyude dan Haabiila dan.

²⁵ Awa reenee wota on salo hedaaade on Wondo on yewtude. Ben Isra'iilayankeebe, salinoobe hedaaade on Wonnoodo be yamirde ka hoore leydi, be dadaano lette den. E ko honno non woniranta en si en huccii on Wondo en yewtude ka kammuuli dow? ²⁶ On mo hito mun dimbi leydi ndin, wadii jooni ndii fodaari d'oo: «Awa mi dimbitoyay nde wootere kadi, hinaa non leydi ndin tun, kono hay kammu ngun.»^f ²⁷ Ngol daalol «nde wootere kadi» no laabi poy holli wonde kala ko tagaa dimboto, dilla, fii no goongaaji di gasataa dimbaade din luttira. ²⁸ Bay laamu ngu hendotoden ngun hinaa dimbotoongu, weltanoden Alla, kurkanoden mo noone no welirta mo e nder teddungal e kulol. ²⁹ Ko fii Alla men on ko yiite sunnoowe.

13

Fii Salminaango e Wakkilingol

^d **12:20** 12.20 Egg. 19.12-13 ^e **12:21** 12.21 Yan. 9.19 ^f **12:26**
12.26 Haj. 2.6

¹ Yo giggol sidfsankaaku ngol duumo. ² Wota on yejjitu wernugol. Ko fii e nder warrugol non wobbe wernii malaa'ikaabe, hara be andaa. ³ Anditee fii kasoobe ben, wa si tawii hidon sokidaa e mabbe, e wonaabe e tampineede ben, wa si tawii ko onon wonaa tampineede.

⁴ Yo mo kala teddin dewgal ngal, awa kadi yo yettindirbe ben yonindiran, ko fii telen-ma d'on, Alla jaaway fjoobe ben e jinoobe ben. ⁵ Wota on ardinir ngurndan mon dan giggol kaalisi, yondinoree ko jogidon kon fewndo doo. Ko fii Alla tigi no wi'i: «Mi accitataa ma e mi tertotaako ma few.»^g

⁶ Mo kala e men no waawi wi'ude e nder pellital:

«Ko Joomiraado on woni faabo an ngon, mi hulataa.

Ko honfun neddo waawanimmi?»^h

⁷ Anditee fii ardotoobe on ben, ben fejnjinannoobe on daaluyee Alla on, miijitodfon fii battane no be wuuri non, nembon gomfinal mabbe ngal. ⁸ Awa Iisaa Almasiihu on ko gooto, o waylotaako hanki e hande e haa poomaa.

⁹ Wota on jabu kala noone janndeji janani selna on. Ko fii no moyyi ka bernde nden tiidiniree moyyere Alla nden, hara hinaa sariyaaji fii jaameteeji di nafaali huunde ben jokkube di. ¹⁰ Ko fii hiden mari *layyorde nde tawata haananaa gollooobe ka *rewirdu adunayankeeru jaamugol ko sakkaa d'on kon. ¹¹ Ko fii *yottinoobe mawbe sadaka ben sakkorayno yiyan ka nokkuure hormorde, kono

g 13:5 13.5 Yaj. 31.6 h 13:6 13.6 Zab. 118.6-7

tebbeeli din sunneteno ka baawo hodo. ¹² Ko dün wadi si Iisaa kadi tampuno ka baawo hodo fii *labbinirgol jamaa on yiyan makko d'an tigi. ¹³ Awa enen kadi, yalten ka baawo hodo fii yahugol e makko, e hoore rondagol hersa ka o rondinoo kan. ¹⁴ Ko fii en maraa doo hodo tabitungo, kono hidsen dabbude aroyayngo ngon. ¹⁵ E innde makko kanko Iisaa, duumoden e wadangol Alla sadaka mantoore, e maanaa sadaka yaltoowo e toni jantotoodi innde makko nden. ¹⁶ Awa wota on weddito e wadugol moyyere e wallindirgol, ko dii woni sadakaaji di Alla jabata weltora.

¹⁷ Doftee ardotoobe on ben, yankinanodfon be. Ko fii hibe ayni fota wonkiji mon din, wa hunitoytoobe ka Alla. Awa etee be wada dün e hoore weltaare, hara hinaa no mettirta be. Si hinaa dun, nafoytaa on.

¹⁸ Awa toranee men: meden felliti wonde meden mari bernde laabunde e nder faale gol nawrude ngurndan amen d'an no feewiri e kala huunde. ¹⁹ Mi torike on fow tentinii toragol fii yo Allaahu on newnanan yiltitagol ka mon no yaawiri.

²⁰ Yo Alla Jom Buttu on, on Artirdo e hakkunde maybe ben Iisaa Joomi men, Ngaynaako Mawdo baali din, rewrude e yiyan *ahadi poomayan-keeri ndin, ²¹ yo o wawnu on e kala ko moyyi fii wadugol faale makko on, o wada e men ko welata mo, tippude e Iisaa Almasiihu on, on mo mangural wonani haa poomaa. Aamiina!

²² Mi torike on, yo musibbe an, jabugol ngol kongol wakkilinayngol, ko fii mi windanii on, mi

rabbindinii.

²³ Awa andee wonde, Timotee, oo musiddo men, yaltinaama ka kaso. Si o hewtitii law, mi yaaday e makko, men yiida e mon. ²⁴ Hiwranee lan ardotoobe on ben fow e yimbe Alla ben fow. Bee fe Italii salminii on.

²⁵ Yo moyyere Joomiraado on wonu e hoore mon on fow.

**Version Pular Fuuta-Jallon
The New Testament in the Fouta-Jallon Pular
language of Guinea**

copyright © 2010 Pioneer Bible Translators

Language: Pular

Translation by: Traducteurs Pionniers de la Bible

Contributor: Pioneer Bible Translators

This translation, published by Pioneer Bible Translators, was published in 2011.

If you are interested in obtaining a printed copy, please contact wab.admin@pbt.org.

The translation was completed in collaboration with Christian Reformed World Mission.

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

 You include the above copyright and source information.

 You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-02-06

PDF generated using Haiola and XeLaTeX on 11 Nov 2022 from source files dated 29 Jan 2022

024b8126-79ef-5039-bc54-7d61889f8ae6